

eux, pardonne-moy mes pechez, pardonne les pechez à mon pere, à ceux de ma lignée, à ceux & à celles qui croiront en ta loy, & extermines les iniustes.

*LE CHAPITRE DES DEMONS,
contenant vingt-huit versets, escrit
à la Meque.*

*Quelques Mahometans intitulent ce Chapitre
des Esprits.*

AV Nom de Dieu clement & misericordieux. Dis au peuple, j'ay receu vne inspiration, que quelques Demons m'ont escouté lors que ie lisois l'Alcoran, & qu'ils ont dit, nous auons ouy lire l'Alcoran miraculeux, il enseigne le droict chemin, nous croyons en ce qu'il contient, nous ne croyons pas que Dieu ait des compagnons, nous croyons qu'il n'y a qu'un seul Dieu, nous ne croyons pas qu'il ayt des femmes ny des enfans, nos ignorants blasphemement contre sa diuine Majesté, neantmoins nous estimions qu'ils ne le pouuoient pas faire. Il y a des hommes qui demandent secours aux Demons & accroissent leur confusion, parce qu'ils disent que Dieu ne fera ressusciter personne; Quelques

Demons ont dit. Nous auons esté iusques au Ciel, nous l'auons trouué garny de gardes & d'estoiles, nous nous sommes arrestez en vn lieu vn peu esloigné pour escouter, il y a vne estoile qui prend garde à ceux qui escoutent & les chasse, nous ne sçauons pas si Dieu hay les hommes qui sont en terre, ou s'il leur veut enseigner le droit chemin, mais nous sommes maintenant au nombre de ceux qui croient en l'vnité de sa diuine Maiesté; Ils ont dit, ô peuple, nous estions auparauant dans vn chemin d'erreur, nous auons crû cy-deuant que Dieu n'agissoit pas en terre, mais personne en quel lieu qu'il soit ne peut eiter d'obeyr à sa volonté, nous auons oüy lire le liure qui enseigne le droict chemin, nous croyons en ce qu'il contient, celuy qui croira en Dieu n'aura peur d'aucun malheur ny d'aucune iniustice; Il y en a entre nous qui sont bons & qui se confient en Dieu, il y en a aussi d'autres qui sont melchans & impies, ceux qui obeissent aux commandemens de Dieu suiuent le droict chemin, & les impies seront precipitez dedans le feu d'Enfer. Si les infidelles eussent suiuy le droict chemin nous leur eussions enuoyé du Ciel abondance de pluye, & donné nostre grace, & les esproueray, & ceux qui mespriseront l'Alcoran seront chastiez. Les Temples sont à Dieu, inuoquez vn seul Dieu dans les Temples, lors que son seruiteur se leue, il adore sa diuine Majesté, peu s'en est manqué que ces Demons n'ayent publié la pluralité de deités; Dis au peuple, adorez Dieu mon

Seigneur, ie crois en vn seul Dieu qui n'a point de
 compagnon, ie ne vous puis ny conduire ny deuoyer
 que par sa permission, si ieluy desobeis personne ne
 me pourra sauuer, & seray sans protection au iour
 du iugemēt, ie ne puis autre chose pour vous que de
 vous prescher sa loy, c'est le sujet de ma mission, ce-
 luy qui desobeira à Dieu & à son Prophete sera dam-
 né, & demeurera eternellement dedans le feu d'En-
 fer. Les meschans cognoistront ceux qui feront pri-
 uez de secours & de protection lors qu'ils verront
 les peines qu'on leur a preparées. Dis leur, ie ne sçay
 pas si ce qu'on vous promet arriuera bien tost, ou si
 Dieu le differera quelque temps, personne ne sçait le
 futur que Dieu, & ceux qu'il a esleus pour estre Pro-
 phetes & Messagers de ses volontez, il leur inspire ses
 commandemens pour les prescher aux hommes, il
 void tout ce que les hommes font, & tient compte
 exact de toute chose.

